

FOR 2009-03-12 nr 298:

Forskrift om tildeling av løyve til havbruk med matfisk av laks, aure og regnbogeaure i sjøvatn i 2009

DATO: FOR-2009-03-12-298

DEPARTEMENT: FKD (Fiskeri- og kystdepartementet)

AVD/DIR: Avd. for havbruk, sjømat og marked

PUBLISERT: I 2009 hefte 3

IKRAFTTREDELSE: 2009-03-12 - 2009-12-31

SIST-ENDRET:

ENDRER:

GJELDER FOR: Norge

HJEMMEL: LOV-2005-06-17-79-§6, LOV-2005-06-17-79-§7, LOV-2005-06-17-79-§8,

LOV-2005-06-17-79-§26

SYS-KODE: BG14j

NÆRINGSKODE: 1302

KUNNGJORT: 17.03.2009kl. 13.40

RETTET:

KORTTITTEL: Forskrift om løyve til havbruk med matfisk, 2009

INNHold

Forskrift om tildeling av løyve til havbruk med matfisk av laks, aure og regnbogeaure i sjøvatn i 2009

Kapittel I. Generelle føresegner

§ 1. Formål

§ 2. Verkeområde

Kapittel II. Fordeling og tildeling

§ 3. Fordeling av løyve i denne runde

§ 4. Utlysing av løyve

§ 5. Innhald i søknaden

§ 6. Tildeling av geografisk fordelte løyve

§ 7. Tildeling av økologiske løyve

Kapittel III. Vederlag og gebyr

§ 8. Vederlag

§ 9. Søknadsgebyr

Kapittel IV. Avsluttande føresegner

§ 10. Vilkår

§ 11. Ikrafttreding

Forskrift om tildeling av løyve til havbruk med matfisk av laks, aure og regnbogeaure i sjøvotn i 2009

Heimel: Fastsett av Fiskeri- og kystdepartementet 12. mars 2009 med heimel i lov 17. juni 2005 nr. 79 om akvakultur (akvakulturloven) § 6, § 7, § 8 og § 26.

Kapittel I. Generelle føresegner

§ 1. Formål

Forskrifta skal medverke til at havbruksnæringa med laks, aure og regnbogeaure blir lønnsam og konkurransekraftig innanfor rammene av ei berekraftig utvikling, og bidra til verdiskaping på kysten.

§ 2. Verkeområde

Forskrifta gjeld tildeling av 65 løyve til havbruk med matfisk av laks, aure og regnbogeaure i sjøvotn, medrekna 5 løyve til økologisk havbruk.

Kapittel II. Fordeling og tildeling

§ 3. Fordeling av løyve i denne runde

I denne tildelingsrunden skal følgjande geografiske fordeling gjelde:

- 7 løyve til Finnmark
- 8 løyve til Troms
- 15 løyve til Nordland
- 7 løyve til Nord-Trøndelag
- 8 løyve til Sør-Trøndelag
- 5 løyve til Møre og Romsdal
- 5 løyve til Sogn og Fjordane
- 5 løyve til Hordaland.

I tillegg kan 5 løyve til økologisk havbruk tildelast uavhengig av fylke eller region.

§ 4. Utlysing av løyve

Fiskeridirektoratet står for den offentlege utlysinga av løyva, og utlysinga skal mellom anna innehalde

- a) opplysningar om kvar søknadene skal sendast, jf. § 6 og § 7
- b) søknadsfrist og at søknader som kjem inn til Fiskeridirektoratet etter søknadsfristen ikkje vil bli behandla
- c) krav til søknaden
- d) storleiken på vederlaget.

§ 5. Innhald i søknaden

Søknaden skal innehalde

- a) opplysningar om søknaden gjeld eit geografisk fordelt løyve, jf. § 3 første ledd eller eit økologisk havbruksløyve jf. § 3 andre ledd
- b) opplysningar som er relevante i høve til tildelingskriteria i § 6 og § 7
- c) kvittering for innbetalt søknadsgebyr
- d) dokumentasjon av økonomisk evne til å betale vederlaget.

Fiskeridirektoratet fastset krav til innhaldet i søknaden ved utlysing og i søknadsskjema. Fiskeridirektoratet kan i tillegg krevje dei opplysningar frå søkjaren som direktoratet meiner er nødvendig for å behandle søknaden.

§ 6. Tildeling av geografisk fordelte løyve

Fiskeridirektoratets regionkontor står for tildelinga av geografisk fordelte løyve. Fiskeridirektoratet er klageinstans.

Fiskeridirektoratets regionkontor skal konsultere den aktuelle fylkeskommunen om næringspolitiske vurderingar i lys av fylkesplanen, medrekna kvar i fylket det er ønskjeleg med meir oppdrettsverksemd. Vurderingane til fylkeskommunen skal dokumenterast.

Det kan berre gjevast tilsegn til søkjarar som dokumenterer økonomisk evne til å betale vederlaget til staten og som planlegg drift på lokalitetar i kommunar med godkjent arealdel av kommuneplan.

Ved prioritering av søknader skal det særleg leggjast vekt på

- a) om søkjar er ein mindre aktør i næringa
- b) om søkjar vil leggje til rette for auka bearbeiding med sikte på økonomisk integrasjon i kystdistrikta i Noreg.

Innanfor PD-sona på Vestlandet skal det i tillegg leggjast vekt på om nytt løyve vil bli nytta på ein slik måte at den samla drifta til selskapet etter tildelinga vil stå fram som meir berekraftig i nedkjempinga av PD, jf. forskrift 20. november 2007 nr. 1315 om sone for å hindre smitte og bekjempe pankreassjukdom hos akvakulturdyr.

§ 7. Tildeling av økologiske løyve

Eitt av Fiskeridirektoratets regionkontor står for tildelinga av økologiske løyve. Fiskeridirektoratet er klageinstans.

Tildeling kan skje til søkjarar som er sertifiserte for økologisk havbruksproduksjon, eller som erklærer at dei med ein gong etter tilsegn om løyve vil starte sertifiseringsprosessen.

§ 6 andre, tredje, fjerde og femte ledd gjeld for desse søknadene.

Produksjonen kan ikkje starte før det ligg føre sertifikat.

Kapittel III. Vederlag og gebyr

§ 8. Vederlag

Ved tilsegn om løyve skal søkjar betale vederlag til statskassa. Vederlaget per løyve er 8 millionar kroner, med unntak av løyva til Finnmark der vederlaget er 3 millionar kroner.

Vederlag for løyve skal betalast seinast innan 30 dagar etter at søkjaren har motteke tilsegna. Tilsegna fell bort dersom vederlaget ikkje er betalt innan denne fristen.

Tilsegna gjev rett til å søkje om lokalitet(ar). Retten til drift startar når løyvedokumentet er skrive ut.

Dersom tildeling av løyve blir omgjort i samband med klage eller etter forvaltninga sitt eige tiltak, får søkjar vederlaget refundert. Vederlaget blir ikkje refundert ved eventuell seinare inndraging av løyve på grunn av tilhøve som nemnt i akvakulturlova § 9. Det same gjeld dersom andre tilhøve gjer at løyvet taper sin verdi.

§ 9. Søknadsgebyr

For behandling av søknad som nemnt i denne forskrifta, skal søkjar betale gebyr, jf. forskrift 21. desember 2001 nr. 1597 om gebyr og avgift i forbindelse med akvakulturvirksomhet § 2 første ledd. Kvittering for betalt gebyr skal leverast saman med søknaden. Manglande innbetaling av gebyr fører til at søknaden ikkje blir behandla.

Kapittel IV. Avsluttande føresegner

§ 10. Vilkår

Det kan setjast vilkår som medverkar til at dei kriteria som er avgjerande for tildelinga blir etterlevde, jf. § 6 og § 7.

Vilkåra skal gå fram av løyvedokumenta.

§ 11. Ikrafttreding

Forskrifta trer i kraft straks.

Databasen sist oppdatert 16. apr 2009